

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Siunissami portørit nakorsaatinik anniarunnaarsitsisartunik nakorsaasiisinaanngorlugit portøritut ilinniartitaanerup annertusineqarnissaannik aallartitsinissamik Naalakkersiusut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Doris Jakobsen, Siumut)

Tunngavilersuut:

Ullumikkut portøritut ilinniarnissamut periarfissaqarpoq. Ilinniartitaaneq ukiualuit matuma siorna aallartinneqarpoq. Portøringgorniarneq sapaatit akunneri 22-it missaanni sivisussuseqarpoq, ilinniarneruleq ingerlanerani nakorsiartarfimmi peqqissaavinnilu uninngasunik isumaginnilluni sulisoqartarpoq. Taamattaarlugu portørit napparsimasunik ingerlassisarpugit ambulancit aamma atorlugit, taamaammat ikiueqqaarneq ilinniartitaanermi qitiulluinnarpoq.

Portøritut ilinniartitaaneq aallartinneqaramili ineriartortinneqarsimanngilaq, tassa portørit nakorsaatinik anniarunnaarsitsisartunik nakorsaasiisinaanissamut piginnaanngorsarneqarsimanngillat.

Isumaqaarpunga portøritut ilinniartitaanerup ineriartorteqqinnissaanut piffissanngortoq, innuttaasummi ajutoortoqarnerani anniarunnaarsitsisartunik nakorsaaserneqarsinnaanissartik pisariaqartittarpaat, tamannalumi aamma aatsitassarsiorneq annertunerujartuinnartoq eqqarsaatigalugu pisariaqaleriartuinnarmat.

Siunnersuutip pisortanut aningaasaqarnikkut allaffissornikkullu kinguneqaatissai

Siunnersuummik suliaqarneq nutserinerlu Namminersorlutik Oqartussani AC-tut atorfillip ukiup affaani sulineranik naleqassangatinneqarpoq, tamannalu aningaasanngorlugu 220.000 kr.-nik naleqarluni.

Ilinniartitaanermik annertusaaneq ullumikkut ilinniartitaanermut sanilliullugu soorunami akisunerussaaq, taamaalilluni Peqqissaanermut Ilinniarfik ilinniartitaanerup nutaap atuutilerneratigut annertunerusumik aningaasartuuteqassalluni. Matumani portøritut ilinniartitaanermi anniarunnaarsitsisartunik nakorsaasiisinaanissamik piginnaanngorsaaneq qanoq sivisutigisumik ingerlanneqarumaarsinnaanera apeqqutaavoq, tamaattumik missingersuusiornissaa maannangaaq ajornakusoopq.

Siunnersuutip namminersortunut allaffissornikkut aningaasaqarnikkullu kinguneqaatissai
Soqanngilaq.

Siunnersuutip innuttaasunut allaffissornikkut aningaasaqarnikkullu kinguneqaatissai
Soqanngilaq.